

M221: Millstätter Sündenklage

- 0,1 wole dû heiliger Krist .
0,2 dû ein wârer got bist
0,3 paradisi porta .
0,4 meister des hellewarten
0,5 den gebant dîn hant .
0,6 dô in dîn goteheit überwant
0,7 in der helle bist dû zornic .
0,8 in himelrîche genædic .
0,9 dû bist rex regum .
0,10 in saecula saeculorum
0,11 paradîses hêrre .
0,12 der erde schepfære
0,13 in den himelen bist dû got .
0,14 der sunne leistet dîn gebot .
0,15 joch diu mæninne .
0,16 liuhtet dâr zuo in minne .
0,17 diu nimet abe sô dû wil .
0,18 sô dû gebiutest sô ist ir vile .
0,19 von den zwein liechten
0,20 diu dû geschüepfe von nihte .
0,21 ist diu werlt al
0,22 licht unz an die helle .
0,23 diu ne mac es niht gewinnen .
0,24 dâ ist iemer vinster inne .
0,25 swie vile viures brinne .
0,26 hêrre dîne knehte .
0,27 alle minnent dich mit rehte .
0,28 ein got mirabilis
0,29 sô dû geschriben bist .
0,30 dû bist hêrre wunderlich .
0,31 dir en ist niht gelîch .
0,32 dû bist mennische vile starc ist dîn gebot .
0,33 und bist doch der êwige got .
0,34 dû bist der heilige geist .
0,35 unde bist doch bein unde vleisch .
0,36 dû bist vater unde kint .
0,37 dû bist regen unde wint .
0,38 dû bist lewe dû bist lamp .

0,39 dû bist kurz dû bist lanc .
0,40 dû bist rîche dû bist arm .
0,41 dû bist kalt dû bist warm .
0,42 dû bist lîp dû bist tô .
0,43 dû bist genâde âne nô .
0,44 dû bist sîeze dû bist scharpf
0,45 dû bist weich dû bist starc .
0,46 dû bist vinster dû bist lieht .
0,47 dû bist leit dû bist liep .
0,48 dû bist bloede dû bist balt .
0,49 dû bist junc dû bist alt .
0,50 daz ist allez an dir .
0,51 ze wiu verhanktest dû mir .
0,52 daz ich kêrte von dir .
0,53 nû bite ich iuch namen drî .
0,54 doch ich es unwert sî .
0,55 daz ich iuch nenne .
0,56 ich wile iuch doch erkennen .
0,57 gewert mich ez iuwer genâde .
0,58 daz ir mich entvæhet .
0,59 dû vater von den himelen .
0,60 unde dîn heilige sun
0,61 unde dîn heiliger geist .
0,62 wan dû selbe wole weist
0,63 daz mich nû ze stunte .
0,64 riuwent mîne sünde
0,65 nû vernim mîne stimme .
0,66 denke hîn ze dîner muoter minne .
0,67 und ouch daz dû ie vernam
0,68 Tobiam unde Saram .
0,69 und durch daz opfer daz dir – gap .
0,70 dô in dîn stimme sînes sunes bat .
0,71 nû vernim mich süntigen man
0,72 wande ich geandert hân .
0,73 einen sun der sînen vater bat .
0,74 daz er im sînen teil gap .
0,75 alles sînes guotes .
0,76 daz er mit übermuote .
0,77 unde mit huore .
0,78 allez zevuorte .
0,79 unde mit sünden sô gare verswante .
0,80 daz er niht en habete .
0,81 dô begunde er halten diu swîn .
0,82 daz was diu lîpnar sîn .
0,83 die wurzen die daz swîn gruop .
0,84 die dûhten in vile guot .
0,85 daz er sich dâ mit nerte .
0,86 wan er anders niht en habete .

0,87 dô gedâhte im der arme .
0,88 waz ob ich mînem vater erbarme .
0,89 daz ich im halte diu swîn .
0,90 jâ habent dei mietliute sîn .
0,91 brôt unde wîn genuoc .
0,92 waz ob er mich heim tuot .
0,93 er minnete mich mit triuwen .
0,94 unde hât umbe mich michel riuwe .
0,95 waz ob ich bin sô sælic
0,96 unde waz ob er mir wirdet genædic .
0,97 dô begunde er gâhen hinnen .
0,98 dô entvienc in mit minnen
0,99 der sîn vater guote .
0,100 wande er im erbarmete
0,101 ich vile armer süntære .
0,102 jâ vorhte ich mir sô sêre .
0,103 ich Sorge alsô harte .
0,104 ze den dînen starken worten .
0,105 dei snîdent sô diu strâle
0,106 die dulte ich hêrre swære .
0,107 si varent sam die wurfsteine .
0,108 jâ ne mac sich unser süntære dechein
0,109 niemer dâ vore bewarn .
0,110 den si vile starke wellent taren .
0,111 dir sint hêrre in kûnde .
0,112 alle meres grunde .
0,113 dei mere al joch die sêwe .
0,114 die bûhele joch die lêwær .
0,115 vliuhe ich an daz meres ort .
0,116 dâ vindet mich daz dîn wort .
0,117 oder in daz apgründe .
0,118 wie schiere ez mich dâ vindet .
0,119 der walt decheinen boum hât .
0,120 dû ne wizzest wole wâ er stât .
0,121 joch daz vinsten tan .
0,122 dâ ne mac sich dechein man .
0,123 niender inne verbergen
0,124 diu hœler in der erde .
0,125 joch die veltsteine .
0,126 die weist dû truhtîn eine .
0,127 vliuhe ich iener dâr in .
0,128 dâ vindet mich daz wort dîn
0,129 dir sint hêrre in kûnde .
0,130 die berge . hoehe unde grunde
0,131 daz hât dû alsô geschaffen .
0,132 ze solichen gemachen .
0,133 daz ez ûf niht en stât
0,134 wande dû ez allez hât .

0,135 ûf dîner hende .
0,136 unz an die stunte
0,137 daz dîn urteil sol ergân .
0,138 über wîp und über man
0,139 daz allez sol verbrinnen .
0,140 dâ bist dû ein rihtære
0,141 den guoten mit – minnen .
0,142 den übelen mit grimme .
0,143 sô bist dû rehter rihtær danne
0,144 obe ich daz rehte vernime .
0,145 sô ez die wîssagen habent geschriben .
0,146 sô wirdet dâ ein hêr gerihte
0,147 ein urteile mit kreften .
0,148 daz ze jungest wesen sol .
0,149 über dise werlt al .
0,150 dâ ne hilfet den liuten .
0,151 silber noch golt daz rôte
0,152 noch miete diu mære .
0,153 noch pfenninge swære
0,154 noch lantrecht noch pfaht .
0,155 dâ rihtet got mit sîner kraft .
0,156 dâ ne hilfet spæhe zunge .
0,157 noch der hêrre sînem manne .
0,158 noch der man sînem hêren .
0,159 swie breit im sîn diu lêhen .
0,160 der voget dâ ne hilfet .
0,161 swie gare er bestroufet
0,162 den sînen armen vogetman .
0,163 er ne getar dâ lût werden .
0,164 dâ rihtet got mit rehte .
0,165 dem hêren joch dem knehte .
0,166 der vrouwen joch der diuwe .
0,167 swie harte uns unser sünde riuwe .
0,168 sô ist ez danne ze spâte .
0,169 wir schulen ez . êr . behüeten .
0,170 sô werdent dâ gescheiden .
0,171 die lieben von den leiden
0,172 die sælige ze der zeswen .
0,173 die sint die ûz erlesen
0,174 bî den êwigen genâden .
0,175 mit den sîn wir geladen
0,176 sô werdent ouch dâ geschicket .
0,177 die leider dicke
0,178 dâ wider got worhten .
0,179 ire schepfær niene vürhten
0,180 vile verre ze der winstere .
0,181 in die êwigen vinstere .
0,182 in die helle vram .

0,183 necheines leides ist si wane .
0,184 dâ ist wuoft unde wê .
0,185 unde sol ouch niemer zergên .
0,186 weinen unde sûftôt
0,187 dâ ist hellewîze nô .
0,188 dâ ist zane grisgramen
0,189 dâr inne brinnet viures vlamme .
0,190 mit beche und mit viure .
0,191 lônet in der tiuvel .
0,192 daz beginnet manigem manne .
0,193 triefen an sîne zungen sîn
0,194 dâ ne gêt ûz ander lôn
0,195 wan mit viurînen banden
0,196 dâ beginnet er si binden .
0,197 in vuozen und ouch in handen .
0,198 sô en tuot in niweht sô nô .
0,199 sô des tiuvels getât .
0,200 der ist alsô vreissam .
0,201 an ze sehen dem manne .
0,202 daz im daz sam wê tuot .
0,203 sam daz viur joch diu gluot .
0,204 sô grînet si an der satanâs .
0,205 dâ ist decheines leides . underlâz .
0,206 Belzebup der übele .
0,207 der hât anders niht ze gebene .
0,208 wan vrost unde hunger .
0,209 daz gibet er dâ ze helle .
0,210 anderhalp die hitze .
0,211 dâ müezen si inne sitzen .
0,212 dâ zuo gît er in ouch .
0,213 den siech brinnenten rouch .
0,214 ze nasen joch ze den ôren .
0,215 dâ ne mac nieman niht gehoeren .
0,216 niuwan die ungehiuren .
0,217 des tiuvels hîwen .
0,218 sô wênic sie sint geboren .
0,219 sô gêt des unseren schepfæres zorn
0,220 über die vîant sîn .
0,221 sô müezen si verteilet sîn
0,222 sô sol diu werlt alliu zergên .
0,223 sîniu gotlîche wort schulen gestên .
0,224 unde sîn rîche
0,225 –[...] .
0,226 daz ne mac niemer –[...] .
0,227 dâ rîchesenet got inne .
0,228 iemer
0,229 unde dâr überhin
0,230 dâ lônet vile schoene .

0,231 der himelküninc vrône
0,232 joch den wîben joch den mannen .
0,233 mit den –[...] [...] .
0,234 die dâr mennischlich zunge .
0,235 niemer mac volbringen .
0,236 sô heizet er si wîsen
0,237 in daz schoene paradîse .
0,238 dâ ist liep unde lieht
0,239 dâ ist dechein ungenâde niht .
0,240 dâ ist minne âne nît .
0,241 vröuwede âne strît .
0,242 dâ ist lîp âne tôt
0,243 genâde âne nôt .
0,244 dâ ne ist vrost noch hunger
0,245 dâ ne brennet si diu sunne .
0,246 dâ ne altet nieman
0,247 wan si schulen iemer jugent hân .
0,248 dâ ist dechein angest .
0,249 der engele sanges .
0,250 vröuwent sich die menige .
0,251 dâ in gotes himele
0,252 dâ ist aller genâden stæte .
0,253 ire ougen . sich niemer gesateten .
0,254 des gotes antlützes .
0,255 dâ si vore im sitzent .
0,256 vile liep er in ze sehen ist .
0,257 sô sprichet der heilige Krist .
0,258 “wole iu iemer liebiu kint .
0,259 ir mit mir hier sint
0,260 iezuo alle gelîche .
0,261 nû gêt in daz himelrîche .
0,262 dâ ir sulet twellen .
0,263 ich wile iu selbe ervüllen .
0,264 swaz ir mir ie ze liebe habet getân .
0,265 daz schulet ir nû wider envâhen”
0,266 sô wirdet dâ michel vröuwede
0,267 über alle die menige .
0,268 die vriunde joch die mâge
0,269 den sol sîn [l]iebe allen dare .
0,270 vile wole erkennenent si sich
0,271 si sehent got tagelîche .
0,272 er sach in –[...] .
0,273 der daz sol gearnen .
0,274 daz er dâ sihet
0,275 die michelen mandunge .
0,276 dâ schulen wir ie denken umbe .
0,277 daz wir si gewinnen .
0,278 nû kume ich vater unde sun .

0,279 zuo iuwerem trône .
0,280 und ze dem heiligem âteme .
0,281 daz er mir râte .
0,282 wie ich die selben genâde müge erarnen
0,283 wande ich mennische armen .
0,284 mich dicke hân versûmet .
0,285 wie sêre mich daz riuwet
0,286 ich armer meintæte .
0,287 mir en helfe iuwer güete .
0,288 sô bin ich gescheiden von iu drîn
0,289 wande ich der allerarmeste bin .
0,290 aller slahte güete .
0,291 daz vorhte ich hêrre nôten .
0,292 ich wolte êr sünden mit gewelte .
0,293 dîn gebot niweht behalten .
0,294 ich bin dîn entrunnener schalc .
0,295 von diu vürhte ich dînen slac .
0,296 wande ich von dîneme dieneste .
0,297 vlôch swâ ich ez weste .
0,298 dâ man dir dienete .
0,299 dâr ich niht en wolte .
0,300 wider dich ranc ich
0,301 von diu rüege ich mich .
0,302 unde kume in dîne gewalt .
0,303 ich bin iedoch dîn eigenschalc
0,304 dû hâst erkoufet mich wîlen .
0,305 mit dînem irdenisch lîbe
0,306 mit tôde dem grimmen .
0,307 hêrre wolte dû mich dir gewinnen .
0,308 durch dîne süeze minne
0,309 daz was hêrre michel reht
0,310 sît mîn lîp ist dîn kneht .
0,311 daz er entvienc dînen slac
0,312 nû sihe ich wole daz ich en mac
0,313 niemer dir enttrinnen .
0,314 nû wile ich wider sinnen
0,315 dîne hulde wile ich gewinnen .
0,316 wole dû heilic Krist .
0,317 dû der mîn rechter vater bist der dîn
0,318 sun hêrre bin ich .
0,319 von diu ruoche hoeren mich
0,320 wan ich hân gesündet .
0,321 nû so[l] iz sîn gekündet
0,322 in den himelen vore dir .
0,323 daz ruoches dû vergeben mir .
0,324 der mînen sünden ist sô vile
0,325 der ich dir nû klagen wile . swære unde
0,326 übergenuoge .

0,327 nû wile ich mich selben rüegen
0,328 êr mich mîn widerwinne .
0,329 rüegen beginne
0,330 der leidige hellewarte .
0,331 der hât geprüvet harte .
0,332 mîne manige missetât .
0,333 – si geschriben hât .
0,334 unde wile die brieve bringen .
0,335 ze dînem tagedinge .
0,336 unde wile dâ rüegen den rât .
0,337 den er mir getân hât .
0,338 die mîne sünde manicvalt .
0,339 die sint komen in sîne gewalt .
0,340 ich vorhte ob ich si spare .
0,341 ze dem jungesten tage .
0,342 daz ich es kume in michel nôt .
0,343 wande niht entwelt der tût
0,344 der nâhet allertagelîche .
0,345 von diu dinge ich an dich .
0,346 nû hilf mir got der guote
0,347 durch den willen dîner muoter .
0,348 daz ich ez . êr . –[...] allerhêrest .
0,349 nû wile ich rüegen êreste
0,350 die mîne arme vuoze .
0,351 den wâren gar ze süeze
0,352 in die sunderstîge .
0,353 ze den übelen wîben
0,354 die der tiuvel hât gestellet .
0,355 dâ er manige bevellet .
0,356 daz sint sîniu netze .
0,357 dâ er si in hât gehetzet
0,358 vile dicke tage joch naht .
0,359 daz ich ez errecken niene mac .
0,360 ze huore wâren si gereht .
0,361 ze kiusche wâren si gebrech .
0,362 ze roube was in sô liep .
0,363 si ne vuoren guotes weges niht .
0,364 dâ wâren si zuo ringe
0,365 der wec in ze swære .
0,366 ze mettene unde ze messe .
0,367 dâ ich ie dîn dienest wesse .
0,368 dâ verrieten si mich
0,369 die vuoze bringe ich schuldige vüre dich .
0,370 daz dû nû über si rihtest .
0,371 swie dû truhtîn wellest .
0,372 iegelîcher harmschare .
0,373 daz mîn sêle niene vare .
0,374 in die helleporte .

0,375 gesündet hân ich harte .
0,376 des bite ich durch die gebende
0,377 dîner hende .
0,378 die dû den juden gæbe
0,379 dô si dich geviengen .
0,380 hêrre nû vernim dû mich
0,381 wande ich dinge an dich .
0,382 nû wile ich rüegen mîniu knie .
0,383 vile selten brâhte ich si ze diu
0,384 daz si vielen vûre dich .
0,385 anderswâr kniewete ich
0,386 daz ist ouch hêrre dem –[...]
0,387 daz ich –[...]
0,388 in daz hore und in den mist
0,389 durch werltlîche lust .
0,390 unde durch üppigen spot
0,391 daz klage ich hêrre got
0,392 dû . rihte über si hêrre
0,393 unde vergip ez mîner sêle .
0,394 geruoche mir genâden
0,395 durch die villâte .
0,396 die dir die juden tâten
0,397 dô si dich martereten .
0,398 nû rüege ich mennische arme .
0,399 die hende die arme
0,400 die meintâtn wile ich betrahten .
0,401 sie kunden verrihten
0,402 die manicvalten sünde .
0,403 die si wider dîne hulde .
0,404 tâten allertagelîche .
0,405 die bringe ich schuldic vûre dich .
0,406 si griffen zuo den swerten
0,407 si sluogen mit den viusten .
0,408 si roubeten unde branten .
0,409 sumelich si blanden .
0,410 si beherten unde bestiezen .
0,411 durch dich si daz en liezen
0,412 den witewen unde weisen .
0,413 unde nâmen ie den goteshûsen .
0,414 daz si ze rehte solten haben
0,415 daz wile ich dir hêrre klagen
0,416 daz si sich burgen .
0,417 vore den mennischen armen .
0,418 der ne wolten si sich niene erbarmen .
0,419 daz si si in ladeten
0,420 si mit hulde habeten .
0,421 noch gap in gewæte .
0,422 noch ie geræte

0,423 den ellenden .
0,424 durch den – dīnen willen
0,425 an den si nie gedāhten .
0,426 ire opfer nie si brāhten
0,427 ze dīneme altære .
0,428 die solt dû villen ze wāre
0,429 hêrre über die solt dû rihten .
0,430 die sint schuldige der ire pflihten
0,431 vergip ez mīner sêle .
0,432 durch dīnes līdenes êre
0,433 dô dû ze dem kriuze gienge .
0,434 dô dich die juden viengen .
0,435 unde dich dâr an hiengen
0,436 genædiger hêrre .
0,437 nû wile ich rüegen mêrer
0,438 mīn herze ist mir entzündet .
0,439 mit wûrzen aller sünden
0,440 daz solte ein – sîn .
0,441 –[...]
0,442 daz gebet daz der man tuot .
0,443 daz en ist ze nihte guot
0,444 ob ez von herzen niene stîget
0,445 dô ez wære bezzer verswîget .
0,446 mīn herze ist dir entgangen .
0,447 des bin ich beswichen .
0,448 über – .
0,449 unde hât dâr ûz vertriben
0,450 die gotelīchen minne .
0,451 unde bûwet mêrer dâr inne
0,452 übermuot diu ist sôgetân .
0,453 diu vellet manigen man .
0,454 diu valte von himele .
0,455 – mit menige .
0,456 diu hât ouch mich ervellet
0,457 unde hât ouch an mir gestellet .
0,458 huor unde vleischlich gelust
0,459 unde ander manic âkust .
0,460 wuot unde tobeheit
0,461 unde lüge vile breit .
0,462 und haz unde nît .
0,463 unde zorn unde strît
0,464 unde bîspræche .
0,465 unde lancræche .
0,466 huoch und übel spot
0,467 danne erloese mich got .
0,468 daz mich dîn gesinde
0,469 dâr an niene vinde .
0,470 daz ich . sælde gewinne

0,471 hêrre bî dîner minne .
0,472 unde den genâden dînen
0,473 dâ ze dem paradîse .
0,474 dô hilf dû mir –[...] gotessun .
0,475 durch dînes vater willen
0,476 und durch des heiligen kriuzes erbe
0,477 daz dû hêrre trûege mit êren .
0,478 nû erloese mîne sêle
0,479 truhtîn êwarte .
0,480 nû wile ich rûegen harte
0,481 daz allerwirseste vleisch .
0,482 daz ich an mir iener weiz
0,483 die zungen mit dem munde
0,484 die vile manige sünde
0,485 wider dir worhten .
0,486 dich si niene vûrhten .
0,487 si sprach diu mæren wort
0,488 si riet huor unde mort
0,489 roup diube unde manslaht .
0,490 swâ sô si mahte
0,491 ouch sagete si anderem manne .
0,492 daz si selbe niht vernam
0,493 si redete mit dem munde .
0,494 – urkûnde
0,495 durch miete joch durch ruom
0,496 jach si trûgelîchen wîstuom .
0,497 ire lantliute –[...]
0,498 als in der glüete .
0,499 umbe eigenwîp unde ire hîwen .
0,500 die lie si niender belîben
0,501 wie si habe unrehte gewinne
0,502 dâ begunde si sinnen .
0,503 si ne welle sîn gelîche –[...]
0,504 si muoze ez iemer entkelten .
0,505 swaz si versolete
0,506 ez wirdet ir vergolten
0,507 dâr umbe brennet . die sêle
0,508 sô der lîp lît in der unêre
0,509 wan si verswuor sich allertagelîche
0,510 niene en schamete si sich .
0,511 des si wider dich missetete
0,512 si minnete unrehte sete .
0,513 in tranke joch in âze
0,514 si en kunde dechein mâze .
0,515 unde trouc gare mit übeln listen
0,516 mînen ebenkristen .
0,517 –[...]
0,518 beidiu ze spotte joch ze hoene

0,519 gâhete ie mîn zunge .
0,520 der sünden brunne
0,521 ze allen zîten ûz ir vlôz .
0,522 daz mir die sêle gare verlôs
0,523 jâ rafste ich si ze selten .
0,524 ez ist nû komen ze rehtem gelte .
0,525 mit munde mit zunge
0,526 dienete ich ie der helle .
0,527 unde dem hellewarten
0,528 ze wâre triuwete ich dînen worten .
0,529 daz si mir riet
0,530 daz solte ich alle vermîden .
0,531 ich klage dir mîne grôze schulde
0,532 nû nim mich in dîne gotelîche hulde
0,533 des bite ich dich durch die drî nagele
0,534 die dir wurden geslagene .
0,535 durch die hende und ouch durch vuoze .
0,536 daz sich mîne sêle iemer menden müeze .
0,537 in dem paradîse vrône
0,538 oben in dem zehenden kôre .
0,539 mitsamet dir vile schoene
0,540 dû keiser aller künige .
0,541 dû –[...] aller himele .
0,542 dû geruoche mich hêrre erhoeren
0,543 nû wile ich rüegen mîniu ôren .
0,544 die sich alsô dicke bewullen
0,545 swaz ich in allen mînen sünden
0,546 ie gevrumete in huore wider dir .
0,547 mîniu ôren brâhten ez mir .
0,548 mit decheinem übelem wîbe .
0,549 daz –[...] .
0,550 swâ si mir die liebten
0,551 daz durch dich ich daz ne lieze .
0,552 ich en verlüre dîne hulde
0,553 daz was hêrre der ôren schult
0,554 swâ diu zunge den roup riet .
0,555 dâ was den ôren ze liep
0,556 diube manslahte .
0,557 tages oder nahtes
0,558 mîniu beidiu ôren hêrre .
0,559 sint schuldic mêrer
0,560 an ungetriuwem rûnene .
0,561 die mich –[...]
0,562 dâr kêrte ich diu ôren .
0,563 si ne wolten –[...] gerne hoeren .
0,564 sô mich arme liute
0,565 durch dînen willen bâten .
0,566 trankes oder âzes

0,567 die vernam ich lazze .
0,568 si hôrten ez ungerne
0,569 schieden danne mit zorne .
0,570 swâ ich ie dir nâhe
0,571 dâ verrieten si mich drâte
0,572 swenne ich in der kirechen .
0,573 vore dir wolte kniewen
0,574 sô ich dâ [...] ne vernam .
0,575 weder wîp oder man
0,576 [...] mohte ich singen .
0,577 sô was mîn gebet ergangen
0,578 [...] mir sâ in muote .
0,579 mîniu ôren ez [...]
0,580 über die solt dû ez rihten .
0,581 mîne [...] dîn hêre
0,582 durch die rede die dû tæte .
0,583 wider dîn hêre muoter .
0,584 dô dû an dem kriuze erstürbe
0,585 und dû si bevülhe .
0,586 dem guoten sancte Johanne
0,587 dem heiligem manne .
0,588 ein maget sunder [...]
0,589 nû rüege ich Krist . gotes sun
0,590 dir als die allerschuldigesten
0,591 beidiu mîniu ougen herte .
0,592 dei wâren [...]
0,593 [...]
0,594 des tages unde nahtes .
0,595 swâ vruo unde spâte
0,596 iht wider dir getâten
0,597 sît ich [...] mohte schouwen
0,598 dâr wîsten mich diu ougen
0,599 swar mîne vuoze giengen .
0,600 dâ si die sünde mohten [...]
0,601 swelicher slahte sô si was .
0,602 dei mîniu ougen wîsten mir die stat .
0,603 swâ mir diu kniee verhangten
0,604 des ich sünde habete .
0,605 oder swâ mir übeles was gâch
0,606 diu ougen wîsten mich dâr nâch
0,607 swaz die hende ie worhten wider dir .
0,608 über [...]
0,609 dâr wîsten mich diu ougen .
0,610 swaz ie tougen
0,611 daz herze gedâhte
0,612 mîniu ougen ez volbrâhten
0,613 swaz die zunge mit dem munde .
0,614 ze übele [...] dir sprechen kunde .

0,615 sô si ez geredete algar .
0,616 mîniu ougen wîsten mich dâr .
0,617 swaz ich süntiger man
0,618 mit den ôren hêrre ie vernam .
0,619 des mînen lîp ich schuldigen –[...] tuon .
0,620 mîniu ougen hulfen mir ie dâr zuo .
0,621 si rieten mir genôte .
0,622 daz ich missetæte
0,623 dei sint hêrre schuldic .
0,624 unde gelîche aller mîn lîp .
0,625 unde alliu lît mîniu .
0,626 die alliu bringe ich schuldigiu .
0,627 in dîne gewalt .
0,628 wan ich bin dîn eigenschalc .
0,629 dâr über rihte dû genôte
0,630 und al nâch dînen genâden .
0,631 unde vergip ez mîner süntigen sêle
0,632 wande si es verhangte ungerne
0,633 nû vernim die klage mîne .
0,634 durch willen der pîne
0,635 die dû erlite durch mich .
0,636 daz hân ich verdient umbe dich
0,637 wis mich losente .
0,638 mit dîner hende
0,639 ûz aller mîner nôt .
0,640 durch dîn heiligez bluot
0,641 hêrre got Sabaôt .
0,642 rex angelôrum
0,643 nû solt dû mich erhoeren
0,644 durch die wâren triuwe
0,645 alsô dû vernæme dîne diuwe
0,646 erhôrtest Mariam . unde Martham
0,647 die umbe dich erdigeten .
0,648 daz dû – soltest heizen lân daz grap .
0,649 der drîe tage begraben was
0,650 in den selben namen bite ich dich
0,651 daz dû gelîphaftigest mich .
0,652 gip mir urstende
0,653 aller mîner sünden .
0,654 durch dînen heiligen tôt
0,655 den dû durch unser nôt .
0,656 hêrre an dem kriuze erstürbe
0,657 êr dû ze helle vüere .
0,658 daz dû die dîne alle
0,659 lôstes von der helle .
0,660 durch die selben losunge
0,661 bitet dich mîn zunge .
0,662 daz dû erlôstest mîne sêle

0,663 an mînem ende hêre .
0,664 von der heizen helle
0,665 und von den wîzen allen .
0,666 daz tuo durch dîne gotelîche kraft .
0,667 durch dîn heiligez grap
0,668 dâ dîn lîchname inne lac .
0,669 hêre got erhoere mich
0,670 an dîne genâde dinge ich .
0,671 unde an den geist und den sun
0,672 ze iuwer drîer genâden ich kume
0,673 dû vater sun und heiliger geist .
0,674 mich solte behüeten allermeiste
0,675 von allen mînen sünden
0,676 solt dû mich hêre entbinden
0,677 durch dîne genædigen gâben die ich alliu vermeit .
0,680 sît mich diu mînen michelen sünden hân verleit
0,681 mit werken unde mit willen
0,682 doch hân ich ie den gedingen .
0,683 swie michel diu schult sî
0,684 sô ist dîn genâde dâ bî .
0,685 michel mêre sô ich
0,686 mich kêrte an dich .
0,687 hêre Krist dû würde sêre gemarteret durch mich .
0,688 næme den tôt ûf dich
0,689 mit ganzer diemüete .
0,690 daz –[...]
0,691 daz dû allez mankünne
0,692 næme dû dir hêre ane .
0,693 unde den tiuvel dû bünde
0,694 mit dîner gewaltigen hende .
0,695 dô tæte –[...]
0,697 –[...] êr spartest dû daz heilige tor
0,698 –[...] vore .
0,699 wande er ez –[...]
0,700 daz sol uns dunken vile guot .
0,701 swaz ich süntiger man .
0,702 durch dînen vînt –[...] habe getân
0,703 daz riuwet mich sêre .
0,704 nû hilf dû hêre
0,705 durch daz dîne hantgetât .
0,706 der übele Satanât
0,707 niene verslîche .
0,708 die sêle iht verdrücke
0,709 –[...] bevilhet der mîn lîp .
0,710 ze –[...] truhtîne .
0,711 swaz ich durch âkust .
0,712 unde durch decheiner sünden gelust .
0,713 wider dich habe getân .

0,714 daz lâze über mînen lîp gân
0,715 mit iegelîcher harmschare .
0,716 daz ich ez an mîner sêle iht gespare .
0,717 swaz dû gehengest über mich .
0,718 hêrre Krist daz lobe ich .
0,719 daz ich an dem urteile .
0,720 niene werde gescheiden
0,721 von dir hêrre mit gewelte .
0,722 dâ solt dû mich behalten .
0,723 durch dîne huote
0,724 vore allem übermuote .
0,725 dâ von mich hêrre behüetete
0,726 dirre genâden ich dich bite
0,727 unde diu diuwe sanctam Mariam .
0,728 –[...]
0,729 daz si sî mit himelischer kraft
0,730 mîner sêle iemer wegehaft .
0,731 und der helfe si ir bereite
0,732 sô si von dem lîchnamen scheide
0,733 hêrre vater êwic .
0,734 nû wis mir genædic
0,735 vergip mir die sünde .
0,736 durch dîne urstende
0,737 und durch den wec sô hêre .
0,738 den dû ze dem kriuze vüere
0,739 ich mane dich dîner worte
0,740 dû spræche “nolo mortem .
0,741 peccatoris”
0,742 unde dû sagetes
0,743 “ich wile ze wære .
0,744 daz er sich bekêre”
0,745 swaz ich süntiger man .
0,746 wider dich ie habe getân
0,747 daz riuwet mich vile sêre
0,748 hilf daz ich mich bekêre .
0,749 nû vergip mir mîne schulde
0,749a unde gip mir dîne hulde
0,749b lâ mich des geniezen
0,750 daz dû dich selben hieze .
0,751 – –
0,752 den guoten hirte vrônen .
0,753 ich volgete dem tiuvel nâch .
0,754 ich bin daz dîn irric schâf
0,755 daz dir was entgangen .
0,756 nû wile ich –[...]
0,757 wole dû heiliger Krist .
0,758 dû dâr mîn hirte bist
0,759 woltest dû des ruochen

0,760 daz dû mich woltest suochen .
0,761 nû mohtest dû mich vinden
0,762 nû riuwent mich mene sünde
0,763 vergip mir mîne schulde
0,764 durch dîn heiligez bilede .
0,765 die [...]
0,766 [...] zuo den dînen .
0,767 [...] [...]
0,768 daz si verloren niene sîn
0,769 des bite ich dich trehtîn eine .
0,770 durch die lebentigen steine
0,771 daz ich niht besitze .
0,772 die vreislîchen hitze
0,773 die die helleknehte habent .
0,774 des bite ich dich durch die drî knaben .
0,775 die dû domine
0,776 beschirmetest in dem glüejenten ovene .
0,777 daz einez was Ananias
0,778 daz ander Asarinas .
0,779 jâ sagent uns diu buoch daz
0,780 daz – daz dritte was .
0,781 des viures ze Babilône
0,782 tet in niender wê .
0,783 ez mohte si niht gebrennen
0,784 wan der dîn engel was mit in dâr inne
0,785 dô beschirmetest dû dîne degene .
0,786 mit dînen vrônen segene
0,787 daz si daz viur niene müejete .
0,788 swie harte der oven glüeje .
0,789 nû bite ich iuch knaben drî
0,790 daz ir mir helfente sît .
0,791 unde daz dû mich erloesest dînen schalc .
0,792 mit dîner gewalt
0,793 mit dîn selbes trôste .
0,794 unde dû si erlôstest
0,795 sô loese ouch mîne sêle .
0,796 daz si niene brinne sêre .
0,797 himelkûninc hêre
0,798 sô dû Daniêlem .
0,799 behüetest durch minne
0,800 vore den tieren den grimmen .
0,801 in der lewengruobe
0,802 daz si niht getorsten gerüeren .
0,803 der in die lewengruobe wart gegeben .
0,804 daz in zebrechen die lewen
0,805 dô bewartest dû dînen schalc
0,806 mit dîner gewalt .
0,807 daz die lewen von im vluchen .

0,808 in einen winkel sich smugen .
0,809 daz machete al dîn goteheit
0,810 si tâten im dechein leit .
0,811 unz dû mit – brôte
0,812 in von danne erlôstest
0,813 nû bite ich den hêren
0,814 den guoten Daniêlen
0,815 daz er mir sî wegente
0,816 daz ouch dû mir sîst vergebene
0,817 mînes lîbes sünde .
0,818 die ich in allen stunten
0,819 hân gevrumet mit mînem lîbe
0,820 alsô dû tæte dem wîbe
0,821 diu durch rüege .
0,822 vüre dich hêre wart gevüeret
0,823 umbe daz dû si hiezest steinen
0,824 si zigen si huores eines .
0,825 unde sprâchen ze wære
0,826 daz si des tôdes wert wære .
0,827 als iz diu alte êwe gebôt
0,828 dû lôstes si ûz michel nôt .
0,829 dô schribe dû an der erde
0,830 den juden unwerden .
0,831 swer âne sünde wære
0,832 daz er des niht verbere .
0,833 er ne . wûrfe an si einen stein
0,834 dô ne was ir aller dechein
0,835 der sich des vermæze
0,836 eine si si liezen .
0,837 si kêrten alle dannen
0,838 einer nâch dem anderen .
0,839 unus post unum
0,840 dô begunden alle rûnen .
0,841 dô rûwen si ire sünde .
0,842 dô vergæbe dû ir an der stunte
0,843 durch die dîne güete .
0,844 daz si ie gesündete
0,845 dô gebiute dû ir hêre .
0,846 daz si sîn niene tæte mêrer
0,847 daz si ire sünden lieze sîn .
0,848 dô wart si dîn trûte
0,849 vaste geloubete si an dich .
0,850 des antlâzes ger ouch ich .
0,851 des dû ir an tæte
0,852 durch dîne güete
0,853 vrô dû si lieze
0,854 nû lâ mich ir geniezen .
0,855 und Daniêles

0,856 dînes wîssagen hêres .
0,857 unde dîner schalke aller
0,858 die dû erlôstest von der helle .
0,859 unde gebiut hêrre sancte Michaêle .
0,860 daz er nere mîne süntige sêle
0,861 daz er si bringe .
0,862 sô si gescheide hinnen
0,863 in daz barn Abrahames .
0,864 durch dîne drî namen âmen âmen